

Pablo Corintocjārārē ape pūrī ojanemo'que ni'i

A'ti pūrī a'tiro weero ojano'pã nise ni'i

Pablo nimu'tārī pūrī Corintocjārārē ojaca be'ro Éfesopata tojacã'cu niwĩ yujupu. Topu nígũ, Corintopure ña'arõ wa'a'que quetire miejacãrã niwã. Tere tu'ogu, Pablo na tiropu maata wa'asĩ'ricu niwĩ. Tojo wa'asĩ'rĩmigũ, wa'aticu niwĩ. Macedonia di'ta pe'e wa'acu niwĩ. Tojo weegu a'ti pūrĩrē Macedonia di'tapu nígũ, ojacu niwĩ. Tito wãmetigu a'ti pūrĩrē miacu niwĩ. Tojo nicã ãpērã cūrē ba'pati-wã'cãcãrã niwã.

Pablo narē a'tere ojacu niwĩ. Jesucristo ye quetire werecusiagu cũ ña'arõ yu'rũsere ojacu niwĩ. Tojo nicã pajasecuorãrē niyeru sērĩbosasere ojacu niwĩ. Apeye, cũ bu'esere ĩ'atu'tirã ye cjasere ojacu niwĩ.

Pablo Corintocjārārē oja'que ni'i

¹ Yũ'u Pablo, Timoteo me'rã musãrē añudu-ti'i. Õ'acũ uaranojõta Jesucristo yũ'ure cũ ye quetire weredutigu cũucu niwĩ. Yũ'u a'ti pūrĩrē musãrē Õ'acũ yarã Corintopu nirãrē oja'a. Tojo nicã nipe'tirã Õ'acũ yarã Acaya di'tapu nirãrē oja'a.

² Musãrē Õ'acũ marĩ pacu, tojo nicã Jesucristo marĩ wioгу añurõ weeato. Tojo nicã musãrē ejerisãjãcã weeato.

Pablo cũ pi'etise queti ni'i

³ Õ'acũ marĩ wioḡu Jesucristo pacure e'catisse o'orã. Cúta marĩrẽ pajaña'mi. Marĩrẽ wãcũtutuacã weenu'cũmi. ⁴ Pi'etisetirinucũ Õ'acũ marĩrẽ wãcũtutuacã weemi. Tojo weerã marĩ quẽ'rã pi'etirãrẽ wãcũtutuacã weemasĩ'i. Marĩrẽ Õ'acũ wãcũtutuacã wee'caranojõta narẽ weemasĩ'i. ⁵ Jesucristo yere wererã, pi'etino'o. Cristo pũrõ pi'eti'quere pi'etitamu'u. Cũ me'rãta, cũ weetamuse me'rã nemorõ wãcũtutua'a. ⁶ Ûsã pi'etirã, musãrẽ wãcũtutuacã uarã, musã yu'rũweticã uarã, tojo pi'eti'i. Õ'acũ ùsãrẽ wãcũtutuasere o'omi. Tojo weerã ùsã quẽ'rã musãrẽ wãcũtutuacã wee'e. Ûsã pi'etironojõ pi'etirãsa'a. Tojo wa'acã, Õ'acũ musãrẽ wãcũtutuacã weegusami. ⁷ Ûsã weronojõ pi'eticã, Õ'acũ musãrẽ wãcũtutuacã weegusami. Tojo weerã ùsã musã añurõ weeatjere masĩyutoja'a.

⁸ Acawererã, ùsãrẽ Asiapũ wa'a'quere masĩcã uasa'a. Ûsã topure uputu waro pi'etiwũ. A'tiro wãcũmiwũ: "Ne põtẽosome. Wẽrĩrãsa'a", nimiwũ. ⁹ "Ûsãrẽ wẽjẽcõ'arãsama", ni wãcũmiwũ. Ûsã ne tutuatiwũ. Tojo wa'a'que añu niwũ. Te me'rã a'tiro wãcũwũ. "Ûsã basu ne weetamumasĩtisa'a. Õ'acũ ni'cũta ùsãrẽ weetamumasĩmi", ni wãcũwũ. Cúta wẽrĩ'cãrãpũre masõḡũ nimi. ¹⁰ "Õ'acũ ùsãrẽ na wẽjẽbo'cãrãrẽ yu'rũowĩ. Ni'cãrõacãrẽ yu'rũonu'cũcã'mi. Be'ropũ quẽ'rãrẽ ùsãrẽ

yu'ruonu'cũcũsami", ni ẽjõpeo'o. ¹¹ Õ'acũrẽ musã ãsãrẽ sãrĩbosanu'cũcã, tojo weegusami. Pãjãrã ãsãrẽ sãrĩbosacã, Õ'acũ añurõ ãsãrẽ weetamugũsami. Cũ tojo weecã ï'arã, pãjãrã e'catise o'orãsama.

Pablo Corintopu wa'asĩ'rĩmi'que ni'i

¹² Apeyere ãsã pũrõ e'cati'i. Õsã a'ti nucũcãpũre weesooro marĩrõ añurõ weesetiwũ. Musã wa'teropu quẽ'rãrẽ tojota weewũ. Tojo weerã ãsã bu'iri marĩrã añurõ tu'oña'a. Õsã basu ãsã masĩse me'rã weetiwũ. Õ'acũ weetamuse me'rã weewũ. ¹³ Musãrẽ ojarã, tu'ota basiose dia'cũrẽ oja'a. Musã tere añurõ masĩcã ua'a. ¹⁴ Cã'rõ masĩtoja'a, masĩrã pe'e. Musã añurõ masĩpe'orã, marĩ wiogũ Jesú apaturi a'ticã, "Õsãrẽ diacjũta nipã", nirãsa'a. Õsã musãrẽ "Añurõ weesetima" nĩrõnojõta musã quẽ'rã ãsãrẽ añurõ wãcũrãsa'a.

¹⁵⁻¹⁶ "Tojo añurõ wa'arosa'a" ni wãcũgũ, Macedoniapu wa'agu, musã tiropu ï'amũ'tãgũ wa'asĩ'rĩmiwũ. "Be'ro ï'amajãmitojatiguti tja", nimiwũ. Pũati musã tiropu ï'agũ wa'asĩ'rĩmiwũ. Musã e'caticã uagu, tojo weesĩ'rĩmiwũ. "Yu'u tojo weecã, Judea di'tapu wa'atjere weetamurãsama" ni wãcũgũ, tojo weesĩ'rĩmiwũ. ¹⁷ Yu'u topu wa'aticã ï'arã, "Wiopesase marĩrõ weema'acã'pĩ", ¿niti? "Cũ no'o uaro weema'agũnojõ nimi", ¿nisari? "Wa'aguti' nĩ'cu nimigũ, a'titiapĩ", ¿niti? "Na'irõ ducayumujãsami", ¿ni wãcũti? ¹⁸ Niwe'e. Õ'acũ ãsã weesere "Diacjũta ni'i", nisami. Tojo

weerã ũsã ne ni'cãti no'o ũaro ducayu, ucũ-ma'awe'e. ¹⁹ ũsã Jesucristo Õ'acũ macũ ucũ'caronojõta ucũ'u. Cũ ne ni'cãti "Weeguti, weesome", niticũ niwĩ. Nipe'tise cũ "Weeguti" ní'caronojõta weemi. ũsã i'tiarã, Silvano, Timoteo, yu'u, cũ ye quetire musãrẽ bu'ewu. Nipe'tise cũ ucũse diacjũ ni'i. ²⁰ A'tiro ni'i. Õ'acũ toduporopure masãrẽ "Añurõ weeguti", nicũ niwĩ. Nipe'tise cũ tojo ní'que Jesucristo cũ a'tise me'rã, cũ wẽri'que me'rã queoro wa'awu. Tojo wa'acã ã'arã, marĩ Õ'acãrẽ "Tojota ni'i", ni e'catipeo'o.

²¹ Õ'acũta marĩrẽ Cristore ãjõpeonu'cũcã weemi. Cũta marĩrẽ cũ yarã wa'adutigu besecu niwĩ. ²² Marĩrẽ cũ yarã wa'acã weecu niwĩ. Cũ yarã ni'i nisere ã'osĩ'rĩgũ Espĩritu Santure o'ócũ niwĩ. Espĩritu Santu marĩ me'rã nĩgũ, cũta Õ'acũ marĩrẽ yu'ruoatjere masĩcã weemi.

²³ Yu'u Corintopure wa'asĩ'rĩmigũ, wa'atiwu. Õ'acũ yu'u tojo wee'quere masĩsami. Yu'u musãrẽ tu'tibosa'a nĩgũ, ma'ĩgũ wa'atiwu. ²⁴ Musã ãjõpeosere "A'tiro pe'e ũa'a", nĩgũ mejeta wee'e. Musã añurõ ãjõpeo'o. Musãrẽ añurõ e'catise me'rã nisetiato nĩgũ tojo weet-amusĩ'rĩ'i.

2

¹ Yu'u toduporopure musãrẽ bujaweticã weewu. Tojo weegu apaturi tja musãrẽ bujaweticã weesĩ'rĩtigu, wa'atiwu. ² Yu'u musãrẽ

bujaweticã weecã, ¿noa yu'ure e'caticã weebosari? Musã dia'cũ yu'ure tojo wee'e. Musã bujaweticã, basiotibosa'a. ³ Tojo weegu yu'u musãrẽ ojawu. Yu'u topu wa'acã, e'caticã weeboronojõ o'orã, yu'ure bujaweticã weebopã. Yu'u a'tiro tu'oña'a. Yu'u e'caticã, musã quẽ'rã e'catibopã. ⁴ Yu'u ojamu'tãca pũrĩrẽ ojagu, pũrõ wãcũque'ti, utiwu. Musãrẽ bujawetiato nígũ mejëta ojawu. Yu'u musãrẽ ma'iyu'ru'u. Musãrẽ tere masĩdutigu ojawu.

Ña'arõ wee'cure acobojoduti'que ni'i

⁵ Ni'cũ ña'arõ weeri masũ marĩrẽ bujaweticã weecu niwĩ. Yu'u dia'cũrẽ tojo weetiwi. Musã quẽ'rã mejãrõta weeno'cãrã niwũ. Marĩ nipe'tirã tojo weeno'cãrã niwũ, weeno'rã pe'e. Yu'u a'tere tojo ucũgũ, uputu waro nibutiagu mejëta wee'e. ⁶ Musã pãjãrã ña'arõ weeri masũrẽ bu'iri da'retoja'a. ⁷ Tojo weerã ni'cãrõacã musã cũrẽ acobojoya. Cũrẽ wãcũtutuacã weeya. Tojo weeticã, cũ bujawetiyu'ruabosami. ⁸ Tojo weegu musãrẽ cũrẽ ma'iduti'i tja. ⁹ Yu'u musãrẽ toduporopure ojawu. “¿Te yu'u duti'quere queorota weemitina?” ni masĩsĩ'rĩgũ ojawu. ¹⁰ Musã no'o ña'arõ weegure acobojocã, yu'u quẽ'rã cũrẽ acobojo'o. Yu'ure ña'arõ weetiwi. Musã pe'ere ña'arõ weewĩ. Yu'ure ña'arõ weetimicã, cũrẽ acobojo'o. Musãrẽ ma'ígũ, tojo wee'e. Jesucristo yu'ure “Cũrẽ diacjũta acobojomi”, ni í'asami. ¹¹ Marĩ cũrẽ acobojoticã, wãtĩ cũrẽ ña'arõ bujawetiyu'rucã wee-

bosami. Jesucristo yere du'ucã'bosami. Marĩ wãĩ weewuasere añurõ masĩ'i.

Pablo Troapu wãcũque'ti'que ni'i

¹² Yu'u Troa wãmetiri macãpu Cristo ye quetire bu'egu etagu, a'tiro bocaewawu. Jesucristo marĩ wiogũ pãjãrãrẽ cũ ye quetire tu'osĩ'ricã weecu niwĩ. ¹³ Tojo nimicã, yu'u Tito marĩ acaweregure bocatigu, pũrõ wãcũque'tiwu. Tojo weegu narẽ we'eriti, wa'a wa'awu Macedonia di'tapu.

Jesucristo me'rã marĩ añurõ weemasĩ'i nise ni'i

¹⁴ Yu'u wãcũque'timigũ, Õ'acũrẽ e'catise o'o'o. Cũ marĩrẽ añurõ weenu'cũcã weemi. Marĩ Cristo yarã nicã, tojo weemi. Marĩ Cristo ye queti werese me'rã masãrẽ cãrẽ masĩcã weemi. Cãrẽ masĩse u'mutise weronojõ nipe'tiropu se'sa'a. ¹⁵ Marĩ Jesucristo ye quetire wererã, u'mutise weronojõ nisa'a. A'tiro ni'i. Masã Õ'acũrẽ e'catise o'ocã, ope weronojõ bajuse me'rã buemorõcã, tu'sasami. A'tere weronojõ marĩ cũ ye quetire werecã ï'agũ, tu'sasami. Te queti nipe'tirã cũ yu'ruo'cãrãrẽ se'sa wa'a'a. Tojo nicã cũ yu'ruono'ña marĩrã pecame'epu wa'ajã quẽ'rã te ucũsere tu'ose'sa wa'ama. ¹⁶ Yu'ruono'tirã Jesucristo ye quetire wererãrẽ ï'arã, cãrẽ ãjõpeotirã "Pecame'epu wa'arãsa'a" nĩrã weronojõ tu'oña'sama. Õ'acũ yu'ruono'cãrã pe'e Jesucristo ye quetire wererãrẽ ï'arã, cãrẽ ãjõpeorã "Marĩ Jesucristo me'rã ninu'cũcã'rãsa'a", ni wãcũsama. Ne ni'cũ

cũ se'saro te quetire weremasĩtimi. Õ'acũ weetamurõ me'rã pe'e weremasĩmi. ¹⁷ Pãjãrã a'tiro weema. Õ'acũ ye quetire wérérã, wapata'ase dia'cũrẽ wãcũma. Ûsã na weronojõ weewe'e. Õ'acũ o'ó'cãrã Cristore da'raco'terã ni'i. Tojo weerã Õ'acũ ï'orõpãre cũ ye quetire queoro were'e.

3

Õ'acũ “Masã wiogũ nigũti” niyu'que ni'i

¹ Ûsã “Õ'acũ ye quetire queoro were'e” nírã, ùsã basu añurõ ucũrã mejëta wee'e. Æpërã tojo weewuasama. Na basu añurõ ucũsama. Æpërãrẽ a'tiro nisama: “Ûsãrẽ papera ojabosaya”, nisama. “Ã'rã añurõ weerã nima”, ni apobosadutisama. “Ûsã tojo weecã, 'Añurã nima', ni ï'arãsama” nírã, tojo weedutisama. ¿Musã na weesetironojõ uati? Ûsã musãrẽ “Añurã ni'i, tojo weerã ùsãrẽ papera apobosaya”, nírã mejëta wee'e. ² Musã Jesucristore ëjõpeo'o. Tojo weese me'rã ùsã musãrẽ queoro bu'e'quere ï'o'o. Tojo weerã Æpërã ojabosaca pũrĩrẽ uawe'e. Ûsã musãrẽ “Ti pũrĩ weronojõ nima”, ni ejeripõ'rãti'i. A'tiro ni'i. Nipe'tirã musãrẽ ï'arã, masĩsama. “Na narẽ diacjũta werepã”, nisama. ³ Musãrẽ Cristo masãrẽ yu'ruomi nisere werewu. Tere ëjõpeocã, Cristo musãrẽ añurõ weewĩ. Cũ musãrẽ tojo weesere Æpërã quẽ'rãrẽ masĩcã uami. Tere masĩdutigu, papera pũrĩpu ojacju me'rã ojaticu niwĩ. Tojo

nicã toduporopu Õ'acũ catinu'cũgũ ãtãpjĩpu oja'caronojõta weeticu niwĩ. A'tiro pe'e weecu niwĩ. Espíritu Santu tutuaro me'rã masã wãcũsere ducayucu niwĩ. Te me'rã Cristo masãrẽ añurõ weesere ï'omi.

⁴ Ûsã Õ'acũrẽ ãjõpeorã, a'tiro nímasĩ'i. Ûsã weresere tu'o ãjõpeo'quere “Diacjũta ni'i”, nímasĩ'i. Cristo weetamuse me'rã ãsã tojo nímasĩ'i. ⁵ “Ûsã se'saro Õ'acũ yere weremasĩ'i”, nirã mejẽta wee'e. Nipe'tise ãsã weesere Õ'acũ weetamuse me'rã pe'e wee'e. ⁶ Õ'acũta “Masã me'rã apoguti” ní'quere ãsãrẽ werecã weewĩ. Cũ ní'que a'tiro ni'i: “Yu'u na wiogu nigũti. Na pe'e yarã nirãsama.” Õ'acũ tojo ní'que Moisé dutise oja'quere yu'tise weronojõ niwe'e. Espíritu Santu masãrẽ Õ'acũ uaro weecã weemasĩimi. “Moisé dutise oja'quere yu'tirãti”, ní'cãrã pe'ere ne basiowe'e. Na bu'iritirã pecame'epu wa'abopã. Espíritu Santu pe'e marĩrẽ catinu'cũcã weemi. ⁷ Õ'acũ Moisére duti'quere ãtãpjĩpu ojanocaró niwũ. Te dutise marĩ yu'runũcãse bu'iri wẽjẽcõ'adutise weronojõ nicaro niwũ. Õ'acũ tere o'ogu, uputu asistese me'rã o'ocu niwĩ. Tojo weero Moisé tere ojacã, cã diapoa asistecaro niwũ. Israe curuacjãrã cã asistecã ï'apõtẽomasĩticãrã niwã. Siape me'rã cã asistese pe'tidijacaro niwũ. ⁸ Te dutise asistese me'rã o'o'que nemorõ Espíritu Santu cã marĩrẽ bu'ese pe'e totá nemo'o. ⁹ A'tiro ni'i. Moisé dutise marĩrẽ “Bu'iri da'reno'rãsama” ní'que añuyu'ruacaro niwũ.

Totá Õ'acũ marĩrẽ bu'iri mooma nise queti pe'e nemorõ añu'u. ¹⁰ Jesucristo yere marĩ ï'acasanũ'cõcãma, Moisé dutise "Añuyũ'rua'a" na ní'que pe'e mejõ nise tojacã'a. ¹¹ Moisé cũ dutise asistese me'rã a'ti'que pe'tiatje nicaro niwã. Jesucristo ye queti pe'e pe'ti-tiatje ni'i. Tojo weero Moisé dutise nemorõ, añuyũ'rũnu'cã'a.

¹²⁻¹³ Ûsã Jesucristo ye queti pe'titiatjere e'catiyutoja'a. Tojo weerã diacjũta were'e. Moisé cũ diapoare asistese nidojatisere pe'tidijacã ï'adutiticũ niwĩ. Tojo weegũ su'tiro casero me'rã mo'acu niwĩ. Ûsã cũ weronojõ weewe'e. Tojo weerã Jesucristo ye quetire uiro marĩrõ bajuyoropũ were'e. ¹⁴ Moisé Õ'acũ duti'quere werecã, Israe curuacjãrã tũ'omasiticãrã niwã. A'tiro nicã quẽ'rãrẽ mejãrõta nima. Na Õ'acũ ye queti ojãca pũrĩrẽ bu'érã, tũ'otima. Cristore ãjõpeorã dia'cũ toduporo oja'quere tũ'oma. ¹⁵ Ni'cãrõacãpũ quẽ'rãrẽ Israe curuacjãrã Moisé oja'quere bu'érã, tũ'otima yujupũ. ¹⁶ Marĩ wiogũre ãjõpeoca be'ro Õ'acũ ye cjasere tũ'ono'o. ¹⁷ Jesucristo marĩ wiogũ Espĩritu Santu me'rã ni'cũta nimi. Tojo weerã marĩ Espĩritu Santu me'rã nĩrã, pecame'epũ wa'abo'cãrã yũ'ruono'cãrã ni'i. ¹⁸ Marĩ Cristore ãjõpeorã ni'i. Tojo weerã marĩ wiogũ añuyũ'ruagũ nimi nisere masĩ'i. Marĩ, marĩ catiri umũco põtẽorõ cũ dia'cũrẽ wãcũnu'cũ'u. Cũrẽ wãcũrã, siape me'rã cũ weronojõ cũ añurõ weesere marĩ quẽ'rã weenemowã'cã'a. Marĩ wiogũ Espĩritu

Santu marĩrẽ tojo weemi.

4

¹ Õ'acũ ùsãrẽ añurõ wéégu, Jesucristo ye quetire wereduticũ niwĩ. Tojo weerã wãcũtutuagirã niwe'e. ² Bopoyoro weesere, tojo nicã masã ì'atiropu weesere yabi ni'i. Õ'acũ wereduti'quere nisoose me'rã werewe'e. Tere ducayuro marĩrõ, queoro dia'cũ were'e. Õ'acũ ì'orõpũre tojo wee'e. Tojo weerã ùsã weresere "Diacjũta werema", nisama. ³ No'o Jesucristo ye quetire tũ'oti ãjõpeotirãnojõ bu'iri da'reno'ajã nima. ⁴ Na ãjõpeotise ye bu'iri a'ti turicjãrã wiogu wãtĩ narẽ tũ'omasitirã, caperi ì'atirã weronojõ dojocã weesami. Cũ, Cristo nipe'tirã bu'ipu añubutiagu nimi nisere ãjõpeodutitigu tojo weesami. Jesucristo masũ weronojõ uputigũ nicũ niwĩ. Cũ Õ'acũ warota nimi. Tojo weegu masãrẽ Õ'acũrẽ masicã weecu niwĩ. ⁵ Ùsã Jesucristo ye quetire wererã, masã ùsãrẽ añurõ wãcũdutarã mejẽta were'e. "Marĩ wiogu Jesucristo nimi, cũrẽta ãjõpeorua'a" nidutirã pe'e were'e. Ùsã a'tiro ni'i: "Jesucristo ùsãrẽ cũ ye quetire weredutise bu'iri masãrẽ da'raco'terã weronojõ ni'i." ⁶ A'tiro ni'i. Õ'acũ ne waropũ a'ti turi na'itĩ'arõ ní'quere bo'reyucã weecu niwĩ. Cũ tere wee'caronojõ cãta tja marĩ ye ejeripõ'rãrĩpu bo'reyucã weecu niwĩ. Cũ yere tũ'omasitimi'cãrãrẽ tũ'omasicã weecu niwĩ. Tojo nicã marĩrẽ Õ'acũ tutuayũ'rũagu nimi

nisere masĩcã weecu niwĩ. Jesucristore masĩrã tere masĩno'o.

Marĩ upu pe'tidijati upu ni'i nise ni'i

⁷ Marĩ ya upu di'ta me'rã yee'queparu weronojõ ni'i. Pe'tiati upu ni'i. Tojo uputimirã, Õ'acũ ye queti añubutiasse quetire cuo'o. Tojo weero masĩno'o. Õ'acũ cũ tutuayu'ruse me'rã te quetire masãrẽ masĩcã weemi. Marĩ ye tutuase me'rã mejẽta wee'e. ⁸ Apetero pũrõ pi'eti'i. Tojo pi'etimirã, uputu waro bujawetiwe'e. Ûsã wãcũque'timirã, uputu waro “¿De'ro wa'abutiarosariba?” niwe'e. ⁹ Masã ùsãrẽ ña'arõ weesĩ'rĩmicã, Õ'acũ ùsãrẽ ne cõ'awã'cãtimi. Na ùsãrẽ tuuquecũumirã, wẽjẽtima. ¹⁰ No'o ùsã wa'aro Jesure wẽjẽ'caronojõta ùsã quẽ'rãrẽ wẽjẽsĩ'rĩmima. Masã ùsãrẽ pi'eticã ï'arã, Jesú catinu'cũgũ ùsãrẽ weetamusere masĩma. ¹¹ Nipe'tise numurĩ ùsã catiro põtëorõ Jesú ye quetire werese bu'iri wẽritawioro ni'i. Tojo weerã ùsã ya upu boadijati upu me'rã Jesucristo cũ nisetisere masãrẽ ï'o'o. ¹² Ûsã pe'e wiose pu'to nimirã, masãrẽ catinu'cũdutirã Jesucristo ye quetire bu'enu'cũ'u.

¹³ Õ'acũ ye queti ojãca pũrĩpu a'tiro ojano'wũ: “Yu'u ãjõpeowu. Tojo weegu Õ'acũ ye cjasere masãrẽ ucũwũ.” Tojota ni'i ùsã quẽ'rãrẽ. Õ'acũrẽ ãjõpeorã, cũ yere ucũ'u. ¹⁴ Marĩ masĩ'i, Õ'acũ, marĩ wiogu Jesure masõ'caronojõta marĩ quẽ'rãrẽ masõgũsami. Marĩ cãrẽ ãjõpeocã, tojo weegũsami. Ûsãrẽ

musã me'rã cã tiropu miagũsami. ¹⁵ Ūsã musãrẽ añurõ wa'adutirã nipe'tisere pi'eti'i. Musã pãjãrãrẽ siape me'rã Ō'acũ añurõ weecã Ɂarã, tojo wee'e. Be'ro pãjãrã a'tere ï'arã, Ō'acũrẽ e'catise o'orãsama. Te me'rã cãrẽ "Añuyurũagu nimi" nĩrã, tojo weerãsama.

¹⁶ Tojo weerã ūsã pi'etimirã, wãcũtu-tuanu'cũcã'a. Mu'ñumirã, siape me'rã nemorõ wãcũtutuanemo'o. ¹⁷ A'tiro ni'i. Marĩ a'ti nucũcãpu pi'etise maata pe'tiatje ni'i. Marĩ Jesucristore ẽjõpeorã pi'eti'que wapa nemorõ añuse pe'titiatjere bocarãsa'a. ¹⁸ Marĩ a'ti nucũcã cjase pe'tiatjere sõ'owaro wãcũnrũticã'rõɁa'a. Bajutise Ɂ'muse cjase pe'ere wãcũnrũrõɁa'a. Marĩ ï'ase pe'tiatje ni'i. Ì'atise pe'e ninu'cũatje ni'i.

5

¹ Marĩ masĩ'i, marĩ ya upu wi'i weronojõ boadjarosa'a. Tojo wa'acã, Ō'acũ Ɂ'muse cja upu pe'titiatji upure o'ogusami. Ti upu masã wéeca upu nitisa'a. ² Diacjũta ni'i. Marĩ a'tiro uputirã uti, caributi'i. Ma'ma upu su'tiwetisĩ'rĩsa'a. ³ Marĩ ma'ma upure cuorã, su'ti marĩrã weronojõ nisome. ⁴ Marĩ a'ti upu me'rã caributi'i. Pũrõ pi'eti'i. Marĩ ya upure wẽriato nigũ mejẽta wee'e. Marĩ ma'ma su'ti sãnarõ weronojõ ducayuato nígũ tojo ni'i. Ma'ma upu pe'titiatji upure cuorãsa'a. Ō'acũ me'rã catinu'cũcã'rãsa'a. Mejã upu boad-jati upu boabajudutia wa'arosa'a. ⁵ Ō'acũta marĩrẽ a'tere apoyucu niwĩ. Cã marĩrẽ

weeatjere masĩmũ'tãdutigu Espĩritu Santure o'óyumu'tãcu niwĩ.

⁶ Tere wãcũrã, wãcũtutuanu'cũ'u. Masĩno'o, marĩ a'ti upũ me'rã nĩrã, marĩ wioꝝũ Õ'acũ tiropũ niwe'e. ⁷ Tojo weerã cũrẽ ĩ'atimirã, Jesucristore ějõpeo'o. Cũrẽ sirutu'u. Be'ropũ wa'atje quẽ'rãrẽ añurõ masĩtimirã, “Õ'acũ tiropũ wa'arãsa'a”, ni'i. ⁸ Marĩ, marĩ ye niatjere e'catiyutoja'a. Tojo weerã marĩ “Marĩ wioꝝũ me'rã niajã, wẽrĩse uamisa'a”, ni'i. ⁹ Tojo nimirã, marĩ catirã o wẽrĩca be'ro marĩ wioꝝũ uaro dia'cũ weenu'cũsĩ'rĩ'i. ¹⁰ A'tiro ni'i. Cristo cã beseatji nũmũ nicã, marĩ nipe'tirãrẽ besegusami. Marĩ ni'cãrẽrẽ marĩ wee'quenũcũ queoro marĩ añurõ o ña'arõ wee'quere wapayegusami.

Õ'acũ cũ me'rã nidutigu uasãse ni'i

¹¹ Marĩ wioꝝũ Cristo marĩrẽ beseatjere wãcũ'u. Tere wãcũrã, cũrẽ wiopesase me'rã ějõpeo'o. Masãrẽ “A'tiro weerõu'a”, ni were'e. Õ'acũ ũsã weesere añurõ masĩmi. Musã quẽ'rãrẽ tojota masĩcã u'a. ¹² ũsã basu ũsã yere apaturi añurõ ucũnemorã weewe'e. A'tiro pe'e wee'e. ũsãrẽ añurõ wãcũdutarã, e'catiato nĩrã tojo wee'e. Tojo weerã musã ãpẽrã bu'icjase dia'cũ bajusere wãcũrãrẽ, ejeripõ'rãpũ cjase wãcũtirãrẽ añurõ yu'ti-masĩrãsa'a. ¹³ ãpẽrã ũsãrẽ “Maatirã weema”, nisama. Na tojo nimicã, ũsã Õ'acũ uaro weerã wee'e. Apeterore “Queoro weema”, nisama. Tere wéerã, musã ye cjasere weerã wee'e.

14 Cristo marĩrẽ ma'imi. Tojo weerã cũ ye quetire were'e. Masĩno'o, Cristo nipe'tirãrẽ wẽrĩ ducayucu niwĩ. Te me'rã masĩno'o, nipe'tirã Cristo wẽrĩ ducayuno'rã wẽrĩcãrã weronojõ tojapã. 15 Cristo nipe'tirãrẽ wẽrĩbosacu niwĩ. Catinu'cũse cuorã na uaro dia'cũ weeticã'to nĩgũ tojo weecu niwĩ. Cũ uaro pe'ere weedutigu wẽrĩ masãcu niwĩ. 16 Tojo weerã ũsã ne ãpẽrãrẽ a'ti umucocjãrã weewuaro weronojõ ĩ'aweewe'e. Yu'u toduporopure Cristore tojo weemiwũ. "A'ti di'tacjũ nimi", ni wãcũmiwũ. Ni'cãrõacãrẽ tojo wãcũno'ña marĩ'i majã. 17 Marĩ Cristo yarã wa'arã, apesu'tiro sãjãrã wee'e. Añuse dia'cũ ducayu'u. Toduporopu no'o uaro weeseti'quere weenemowe'e majã.

18 Õ'acũta marĩrẽ tojo weecu niwĩ. Marĩ Cristore ĩ'atu'tirã nicãrã niwũ. Cũ pe'e cũ wẽrĩse me'rã marĩrẽ cũ me'rãcjãrã sãjãcã weecu niwĩ. Nipe'tirãrẽ tojo wa'acã uagu, cũ ye quetire weredutigu marĩrẽ o'ócũ niwĩ. 19 A'tiro ni'i. Õ'acũ nipe'tirã a'ti turicjãrãrẽ cũ me'rãcjãrã sãjãcã uami. Tojo weegu Cristore wẽrĩduticu niwĩ. Te me'rã masãrẽ cũ yarã sãjãcã weegu weemi. Jesucristo wẽrĩse me'rã narẽ bu'iri marĩrã ĩ'ami. Tere ãpẽrã masĩcã uagu ũsãrẽ weredutiwĩ.

20 Tojo weerã ũsã Cristo ducayurã ni'i. Cũrẽ, cũ ye quetire werebosa'a. ũsã werese me'rã Õ'acũ musãrẽ "Yu'u me'rãcjãrã nima", nisami. Tojo weerã musãrẽ Cristo dutiro me'rã "Añurõ Õ'acũ me'rã niato", ni'i. 21 Cristo ne cã'rõacã ña'arõ weeticũ niwĩ. Õ'acũ pe'e marĩ ña'arõ

weese bu'iri cūrē wērībosa ducayuduticu niwī. Cūrē ña'agūrē weronojō bu'iri da'recu niwī. Tojo weese me'rā Ō'acū marīrē Cristo yarā wa'acā weecu niwī. Tojo nicā cū ɰaro cū weronojō añurō nidutigɰ tojo weecu niwī.

6

¹ Ūsā Ō'acū yere da'ratamurī masā ni'i. Tojo weeyurā, cū musārē añurō weesere wācūdu-ti'i. Cū ɰaronojōta añurō weeya.

² Ō'acū ye queti ojāca pūrīpɰ cū ucū'quere a'tiro ni ojano'wū:

Yɰ'u masārē añurō weeritero nicā, mu'u sērīsere tu'owɰ.

Yɰ'u yu'ruoritero nicā quē'rārē, mu'urē yu'ruowɰ, nicu niwī Ō'acū.

Tu'oya. Ni'cārōacā cū tojo weeritero ni'i. Ni'cārōacā cū yu'ruosī'rīsami.

³ Āpērārē ūsā weresere mejēcā wācūdutitirā ūsā ne cārō ña'arō weewe'e. ⁴ A'tiro pe'e

wee'e. Nipe'tise ūsā weese me'rā Ō'acūrē da'raco'tesere ī'o'o. Pi'etirā, tojo ī'o'o. Ūsārē apeyenojō du'sacā, tojo tu'oña'cā'a. Mejēcā

wa'acā, nu'cā'a. ⁵ Ūsā a'tere pi'etiwɰ. Masā ūsārē tārāwā. Bu'iri da'reri wi'ipɰ sōrōwā. Cumuca wa'acā, tu'oña'wū. Ūputɰ da'ra,

apeterore cārītiwɰ. Ūjaboawɰ. ⁶ Ūsā Ō'acūrē da'raco'tesere ī'orā, a'te quē'rārē

wee'e. "Numiarē ña'arō weesī'rīsā'a", ni-we'e. Narē tojo ī'acā'a. Ō'acū ye cjase diacjū nisere masī'i. Āpērā queoro weetisere

nu'cã'a. Āpěrãrẽ pajaña'a. Āpěrãrẽ weesooro marĩrõ ma'imẽ'ricã'a. Espĩritu Santu ũsã me'rã nise bu'iri ũsã Ō'acũrẽ da'racõ'tesere ĩ'ono'o. ⁷ Diacjũta were'e. Ō'acũ cũ tutu-asere cuo'o. Cũ ũsãrẽ añurã wa'acã weemi. Tojo weerã añurõ weemasĩ'i. Ña'ase quẽ'rãrẽ cã'mota'amasĩ'i. ⁸ Masã ũsãrẽ a'tiro weema. Āpěrã ũsãrẽ añurõ ucũma. Āpěrã ña'arõ ucũma. Āpěrã ũsãrẽ nisoori masãrẽ weronojõ ĩ'ama. Āpěrã pe'e "Diacjũta werema", ni ĩ'ama. ⁹ Āpěrã ũsãrẽ añurõ ĩ'amasĩma. Tojo nimirã, ĩ'amasĩtirã weronojõ ĩ'ama. Apeterore ũsãrẽ wějẽsĩ'ricã, tu'oña'a. Tojo nimicã, catinu'cũ'u. Ũsãrẽ bu'iri da'reyu'rũoma. Wějẽtima, wějẽrãpua. ¹⁰ Ũsã bujawetimirã, e'-catinu'cũcã'a. Ũsã pajasecuorã nimirã, ũsã bu'ese me'rã ãpěrãrẽ peje cuorã weronojõ nicã wee'e. Ne apeyenojõ moomirã, cuope'orã weronojõ ni'i. A'te nipe'tise me'rã nipe'tirãrẽ ũsã Ō'acũrẽ da'racõ'tesere ĩ'o'o.

¹¹ Acawererã, Corintocjãrã, du'aro marĩrõ musãrẽ ũsã wãcũsere werepe'ocã'a. Musãrẽ pũrõ ma'i'i. ¹² Musãrẽ ne mejẽcã wãcũwe'e. Musã pe'e ũsãrẽ mejẽcã tu'oña'sa'a. ¹³ Yu'u ni'cũ cũ põ'rãrẽ dutiro weronojõ musãrẽ dutiguti. Yu'u musãrẽ diacjũ ma'irõnojojõta yu'u quẽ'rãrẽ ma'ĩa.

Ō'acũ põ'rã ni'i nise ni'i

¹⁴ Jesucristore ějõpeotirã me'rã a'mesu'aticã'ña. Añuse, ña'ase me'rã morẽta basi-otironojõta añurõ weerã, ña'arõ weerã me'rã

a'mesu'ata basiowe'e. Bo'reyuse na'itĩ'arõpu nitironojõta Jesucristore ùarã me'rã, ùatirã me'rã morẽsu'uta basiowe'e. ¹⁵ Cristo quẽ'rã, wãtĩa wiogu me'rã ni'cãrõnojõ wãcũse cuomasĩtima. Ëjõpeogu, ëjõpeotigu me'rã ne ni'cãrõnojõ "Tojo weeru'a", nĩmasĩtisama. ¹⁶ Õ'acũ wi'i, tojo nicã ëjõpeose queose yee'que me'rã ne ni'cãrõnojõ niwe'e. Musã pe'e Õ'acũ wi'i cũ nirõpu weronojõ ni'i. Cũ catinu'cũgũ nimi. Cũ a'tiro nicu niwĩ: Yu'u na tiropu ni, na me'rã ninu'cũgũsa'a. Na wiogu nigũsa'a.

Na quẽ'rã yarã nirãsama, nicu niwĩ.

¹⁷ Tojo weegu aperopu quẽ'rãrẽ marĩ wiogu tutuayu'rugu a'tiro ninemocu niwĩ:

"Ña'arã tiropu nimi'cãrã wijawã'cã wa'aya.

Nipe'tise ña'arõ weesere ne weeticã'ña.

Tojo weecã, yu'u musãrẽ ñe'egũti.

¹⁸ Yu'u musã pacu nigũti.

Musã pe'e yu'u põ'rã nirãsa'a", nicu niwĩ, ni ojano'wũ.

7

¹ Acawererã yu'u mairã, musãrẽ nigũti.

Õ'acũ marĩrẽ "Musã pacu nigũsa'a", nicu niwĩ.

Tojo weerã marĩ nipe'tise ña'arõ weesere, upure dojorẽsere, ejeripõ'rãrẽ dojorẽsere cõ'arã.

Õ'acũrẽ wiopesase me'rã cũrẽ ëjõpeorã, cũ ùaro nipe'tisere queoro weerã.

Corintocjãrã toduporo ña'arõ wee'cãrã na dũcayu'que ni'i

2 Ūsārē ma'īna. Ne ni'cūrē musārē ña'arō weetiwū. Tojo nicā ne āpērārē dojorētīwū. Musārē ējōpeodutirā weesootiwū. 3 Yū'u "Bu'iri cūrā nima", nigū mejēta wee'e. Yū'u toduporo ní'caronojōta musārē ma'i'i. Marī catirā, ni'cārō me'rā ni'i. Wērīrā quē'rā ni'cārō me'rā ninu'cūrāša'a. 4 Yū'u musārē "Di-acjūta weema, añuyū'ruama", ni ejeripō'rātī'i. Musārē wācūgū, wācūtutua'a. Pūrō pi'e-timigū, e'catiyū'rua'a.

5 Macedoniapure ejáca be'ro ūsā ne cārō sootiwū. No'o ūsā wa'aro pūrō pi'etiawā'cāwū. Āpērā ūsārē ña'arō weequenu'cōwā. Ūsā bu'e'cārārē wācūgū, uputu wācūque'ticāti. 6 Tojo weemicā, Ō'acū wācūtutuasere o'ogu ūsārē wācūtutuacā weewī. Titore ūsā tiropu etacā wéegu, ūsārē tojo weewī. 7 Cū etase me'rā dia'cū wācūtutuatiwū. Musā cūrē wācūtutuacā wee'quere tu'orā, nemorō wācūtutuanemowū. Musā yū'ure ī'asī'rīserere cū werewī. Apeye quē'rārē musā bujawetisere werewī. Tojo nicā musā yū'ure wācūnu'cūserere werewī. Tere tu'ogu, totá nemorō e'catinemowū.

8 Yū'u ojáca pūrī me'rā musārē bujaweticā weewū. Tojo bujaweticā weemigū, yū'u ojacā, añu niwū. Ne waro yū'u ojáca be'ro musārē cārō yoaticā bujaweticā ī'agū, "Yū'u ojaticā, añu nibopā", ni wācūmiwū. 9 Ni'cārōacāma yū'u e'catī'i. Musā bujawetise ye bu'iri mejēta ni'i. Musā bujawetitjārā, ña'arō weesere du'u, ducayua wa'aporo. Tojo weegu e'catī'i. Musā ña'arō wee'que bu'iri Ō'acū uaronojōta bujawetiaporo. Tojo

weerã “Ûsã musãrẽ dojorẽrã mejẽta weepã”, ni'i. ¹⁰ Marĩ Õ'acũ ñaronojõta bujawetirã, ña'arõ weesere du'u'u. Du'u, pecame'epu wa'abo'cãrã yu'ruono'rãsa'a. Tojo weerã añurõ yu'rũweti'i. Æpẽrã pe'e na ña'arõ wee'quere du'utirã, mejõ waro bujawetima'asama. Tojo bujawetirã bu'iri cõorã, pecame'epu wa'asama. ¹¹ Musã Õ'acũ ñaronojõ bujawetirã, a'tiro weeaporo. Musã weesetisere wiopesase me'rã ï'aporo. Tojo wiopesase me'rã ï'arã, “Todũporopure queoro weetipã; ni'cãrõacãrẽ queoro wee'e majã”, niaporo. Musã wee'quere wãcũrã, bujawetiaporo. Tojo nicã tere wãcũrã, uia wa'aporo. Be'ro yu'ure pũrõ ï'asĩ'rĩaporo. Ña'arõ weegure queoro bu'iri da'reaporo. Nipe'tise tojo weese me'rã musã bu'iri moosere ï'oaporo. ¹² Tojo weegu musãrẽ ojagu, ña'arõ weegure weetamusĩ'rĩgũ ojatiwũ. Ña'arõ weeno'gũ quẽ'rãrẽ weetamugũ ojatiwũ. Musã pe'ere weetamusĩ'rĩgũ ojawũ. Musã ùsã ñaronojõ añurõ weesĩ'rĩ'i. Tojo weegu tere masĩdutigũ ojawũ. Õ'acũ tojo masĩcã ñami. ¹³ Nipe'tise musã añurõ wee'que me'rã ùsã e'cati, wãcũtutuawũ.

Tojo wãcũtutuarã, Tito pũrõ e'caticã ï'arã, totã nemorõ e'catinemowũ. Musã nipe'tirãputa cũ bujaweti'quere wãcũtutuacã weecãrã niwũ. Tojo weegu e'catiwĩ. ¹⁴ Musã ye cjasere yu'ũ Titore na añuyu'ruama nĩgũ, nisoogu weronojõ nitiwũ. Nipe'tisere yu'ũ musãrẽ were'quere diacjũta werewũ. A'te weronojõ ùsã Titore musã ye cjasere were'que

quẽ'rã diacjũta niwũ. ¹⁵ Musã cũrẽ wiopesase me'rã ñe'ecãrã niwũ. Cũ dutisere yu'ticãrã niwũ. Musã tojo wee'quere wãcũgũ, musãrẽ nemorõ ma'iyu'ruami. ¹⁶ Yu'u musãrẽ añurõ weerãsama nígũ, pũrõ e'cati'i.

8

Marĩ curo ejatuario ãpẽrãrẽ o'odutise ni'i

¹ Acawererã, ãsã a'tiro musãrẽ weresĩ'rĩsa'a. Õ'acũ Jesucristore ãjõpeorã Macedoniapu nirãrẽ añurõ weewĩ. Cũ ãpẽrãrẽ weetamucã weewĩ. Tere musãrẽ masĩcã ua'a. ² A'tiro ni'i. Na uputu pi'etirã, queoro weecãrã niwã. Tojo pi'etimirã, pũrõ e'cati'wã. Na pajasecuroã waro nimirã, peje curoã weronojõ ãpẽrãrẽ añurõ weetamuwã. ³ Na curo põtẽorõ na curose o'owã. Na curose nemorõ o'oyu'ruomujãwã. Yu'u narẽ tojo weecã ã'awũ. Na uaro o'owã. ⁴ Õsãrẽ pejetiri a'tiro niwã: "Õ'acũ yarã pajasecuroãrẽ niyeru o'osĩ'rĩsa'a", niwã. ⁵ Õsã wãcũ'caro nemorõ weewã. Ne warore na Õ'acũrẽ ãjõpeorã "Mu'u yarã ni'i", niwã. Be'rore ãsãrẽ "Musã dutisere weerãti Õ'acũ uaronojõta", niwã. ⁶ Na Macedoniacjãrã tojo weecã ã'arã, ãsã Titore musã tiropu wa'aduti'i. Cũ toduporopu musã tiro Corintopu nígũ, niyerure sãrĩneocu niwĩ. Tere sãrĩtu'ajanu'cõdutirã cũrẽ o'orã wee'e. Tojo weerã musã añurõ nu'cã'quere queoro tu'ajanu'cõrãsa'a. ⁷ Musã nipe'tisere añurõ wee'e. Añurõ ãjõpeoseti'i. Õ'acũ ye cjasere añurõ masĩ'i. Añurõ bu'eseti'i. E'catise me'rã añurõ

weesĩ'rĩ'i. Ũsãrẽ añurõ ma'i'i. Musã te nipe'-tisere añurõ weronojõta niyeru o'ose quẽ'rãrẽ mejãrõta weeya.

8 Musãrẽ dutibutiagu mejẽta wee'e, weegupua. Musã ãpẽrã weesere ĩ'asa'a. Na añurõ ma'ima. Musã quẽ'rã na tojo weesere ĩ'arã, “Ũsã quẽ'rã ¿diacjũta ma'imiti ũsã?” nidutigũ tojo ni'i. 9 A'tiro ni'i. Musã masĩsa'a, marĩ wioꝝu Jesucristo marĩrẽ añurõ weecu niwĩ. Cũ peje cuoꝝu nimigũ, marĩ ye niatjere pajaña'gũ a'ti di'tapũ a'tigu, pajasecuoꝝu weronojõ wa'acu niwĩ. Marĩrẽ añurõ weesĩ'rĩgũ, tojo weecu niwĩ.

10 Musã a'tiro weecã, añu nibosa'a níꝝũ, yu'u wãcũsere musãrẽ nigũti. A'tiro ni'i. Si cũ'ma me'rã musã ape macãcjãrã duporo niyeru o'osere nu'cãcãrã niwũ. Tere o'orã, e'catise me'rã o'ocãrã niwũ. 11 Tojo weerã musã ne waro weewã'cõ'caronojõta weetu'ajaya. Musã cuoro ejatuaro o'oya. 12 A'tiro ni'i. Marĩ diacjũta marĩ cuoro ejatuaro o'osĩ'ricã, Ő'acũ e'catisami. Marĩ moocã, o'odutitisami.

13 Musã ãpẽrãrẽ peje cudutirã o'oyu'ruobosa'a. Tojo weerã moorã tojabosa'a. Tojo wa'acã uawe'e. 14 Mejõ ni'cãrõnojõ cudutigũ tojo ni'i. Ni'cãrõacã musã cuose me'rã narẽ weetamumasĩ'i. Be'ropũ na quẽ'rã na cuose me'rã musãrẽ weetamurãsama. A'tiro wéerã, musã ni'cãrõnojõ cuorãsa'a. 15 Ő'acũ ye queti ojaca pũrĩpu oja'caronojõta ni'i. A'tiro ojano'o: “Peje cuomi'cu cuoyu'ruosome. Apĩ

pejeti cuogu quẽ'rã ñe'enojõ du'sano'some", ni ojano'wã.

Tito cã me'rãcjãrã me'rã Corintopu wa'atje ni'i

¹⁶ Yu'u musã ye cjasere wãcũque'ti'i. Yu'u wãcũque'tiro weronojõ Tito quẽ'rãrẽ Õ'acũ wãcũque'ticã weecu niwĩ. Tojo weegu Õ'acũrẽ e'catise o'o'o. ¹⁷ Tito yu'u o'ócã, maata yu'tiwĩ. Ni'cãrõacãrẽ cã musãrẽ ï'asĩ'rĩ'cu nitjãgã, cã añurõ tu'saro me'rã musã tiropu wa'agusami. ¹⁸ Tito me'rã apĩ o'ónemorãsa'a. Cũ marĩ acaweregu Jesucristore ãjõpeogu nimi. Nipe'tirã Jesucristore ãjõpeori curuacjãrã cãrẽ a'tiro ucũma: "Cũ Jesucristo ye quetire wereme'rĩyu'ruami", nima. ¹⁹ Apeye quẽ'rãrẽ, Jesucristore ãjõpeose curucjãrã ùsãrẽ ba'patidutirã cãrẽ besecãrã niwã. Niyeru sãrĩneo'quere miacã, cã ùsã me'rã ba'patiwã'cãgũsami. Ùsã niyerure miarã, masã marĩ wiojure añurõ ucũdutirã tojo wee'e. Tojo nicã ùsã e'catise me'rã weetamusĩ'rĩsere ï'orã tojo wee'e. ²⁰ Ùsã a'tere tojo wéerã, masã ùsãrẽ "Niyeru bajuriopã" nidutitirã tojo wee'e. ²¹ A'tere wéerã, ùsã marĩ wiogu ï'orõpũre queoro weesĩ'rĩ'i. Tojo nicã masã ï'orõpu quẽ'rãrẽ queoro weesĩ'rĩ'i.

²² Apĩ marĩ acaweregu quẽ'rãrẽ na me'rã o'ónemo'o. Cũ upũtu weetamusĩ'rĩsere pejetiri ï'owĩ. Totã ni'cãrõacãrẽ musãrẽ na queoro weepãrã nígũ, weetamusĩ'rĩmi. ²³ Titore ãpẽrã sãrĩtiña'cã, a'tiro niña: "Pablo me'rãcjũ cã me'rã da'ragu ùsãrẽ weetamugũ nimi",

niña. Āpērã puarãrẽ sērĩtiña'cã pe'ema, a'tiro niña: “Jesucristore ějõpeori curuacjãrã na o'ó'cãrã nima. Na, na weese me'rã Cristore añurõ ucũcã weema”, niña. ²⁴ Ma'ise me'rã narẽ ñe'eña. Tojo weecã, ãpērã musã Tito quẽ'rãrẽ ma'isere masĩrãsama. Ũsã ãpērãrẽ a'tiro nitojawũ: “Corintocjãrã masãrẽ añurõ ñe'ema”, niwũ. Musã tojo weecã ĩ'arã, na ũsã ní'quere “Diacjũta nipã”, nirãsama.

9

Niyeru sērĩneose ni'i

¹ Musã Jesucristore ějõpeorãrẽ niyeru o'osere ojanemowe'e. ² Musã o'osĩ'rĩsere masĩtoja'a. Musã tojo weesĩ'rĩsere yu'u e'catise me'rã Macedoniacjãrãrẽ werewũ. “Si cũ'ma me'rã Corintocjãrã Acaya di'tapũ nirã niyeru sērĩneonũ'cãsi'rĩwã”, niwũ narẽ. Tere tũ'orã, pãjãrã Macedoniacjãrã quẽ'rã e'catise me'rã niyeru neonũ'cãwã. ³ Musãrẽ “Niyeru o'orãsama” nimigũ, Titore cũ me'rãcãjãrã me'rã musã tiropũ o'óguti. Yu'u Macedoniacjãrãrẽ ní'que queero wa'acã ũa'a. Yu'u “Corintocjãrã niyeru neonũ'cãtojawã” ní'caronojõta musã o'oatjere cuoyutojaya. ⁴ Apetero yu'u musã tiropũ wa'acã, Macedoniacjãrã yu'u me'rã wa'abosama. Ũsã topũ etacã, musã neoyuticã, yu'u upũtũ bopoyasãbosa'a. Yu'u “Na neonũ'cãtojawã” ní'que ye bu'iri tojo weebosa'a. Musã quẽ'rã mejãrõta bopoyabosa'a. ⁵ Tojo weegũ yu'u a'tiro wãcũ'u. Yu'u musã tiropũ wa'ase dũporo Tito quẽ'rãrẽ

wa'aduti'i. Na musã “O'orãti” ni sêrĩneo'quere apoyurãsama. Na tojo weecã, ùsã ejase duporo cuoyotojarãsa'a. Tojo weerã musã wãcũrõ o'orãsa'a. Tojo weetirã, ùsã ejarãpu “O'oroũa'a” nicãma, musã ãpêrã dutiro weerã weebosa'a.

⁶ Musã a'tere wãcũña. Marĩ cã'rõacã otecã, marĩ ote'que cã'rõacã pĩrĩ ducati'i. Peje otegunojõ peje pĩrĩ ducatinosami. Te weronojõ marĩ pajasecuorãrẽ pajiro o'ocã, Õ'acũ quẽ'rã marĩrẽ o'o'caro ejatuario o'osami. ⁷ Marĩnucũ tocã'rõ o'oguti ni tu'oña'rõ o'oroũa'a. Marĩ o'osĩ'rĩtirã, o ãpêrã dutiro weronojõ tu'oña'rã, o'oticã'rõũa'a. Marĩ e'catise me'rã o'ocã, Õ'acũ marĩrẽ ma'isami. ⁸ Õ'acũ nipe'tise añuse musãrẽ o'oyu'ruo o'omasĩmi. Cũ tojo weecã, musãrẽ du'sasenojõrẽ cuope'orãsa'a. Tojo nicã no'o nisere ãpêrãrẽ weetamunu'cũrãsa'a. ⁹ Õ'acũ ye queti ojãca pũrĩpu oja'caronojõta ni'i. A'tiro ojano'caro niwũ:

Añugũ pajasecuorãrẽ añurõ o'omu'sĩ o'osami. Tojo weero cã añurõ weese ninu'cũcã'rõsa'a.

¹⁰ Õ'acũ otese capere o'omi. Tojo nicã ba'ase quẽ'rãrẽ o'omi. Cũta nipe'tise musã cuoatjere o'ogusami. Nipe'tisere nemorõ cuocã weegusami. Tojo weerã musã ãpêrãrẽ nemorõ o'omasĩrãsa'a. ¹¹ Tojo weerã peje cuorã, ãpêrãrẽ o'omu'sĩ o'orãsa'a. Ûsã quẽ'rã musã o'osere pajasecuorãrẽ o'orãti. Musã tojo o'ocã ï'arã, marĩ acawererã Õ'acũrẽ e'catise o'orãsama. ¹² Musã Õ'acũ yarã pa-

jasecʉorãrẽ o'orã, narẽ weetamurã wee'e. Õ'acũ quẽ'rãrẽ e'catise o'ocã wee'e. ¹³ Musã sërĩneosere o'orã, Cristore queoro ëjõpeosere narẽ ï'o'o. Musã cũ dutisere yu'ticã ï'arã, Õ'acũrẽ e'catipeorãsama. Musã pajiro o'osere ï'arã, Õ'acũrẽ añurõ wãcũrãsama. Tojo nicã nipe'tirãrẽ o'osere ï'arã, tojo weerãsama. ¹⁴ Na pe'e quẽ'rã musãrẽ ma'írã, Õ'acũrẽ sërĩbosarãsama. Õ'acũ musãrẽ añurõ weecã ï'arã, tojo weerãsama. ¹⁵ Õ'acũ marĩrẽ Jesucristore o'ogu, añubutiaro weegu weecu niwĩ. Tojo weerã cũrẽ e'catise o'orã.

10

Pablo “Jesucristo besecú'cu ni'i” nisere were'que ni'i

¹ Yu'u Pablo musãrẽ apeyenojõ wereguti. Cristo tu'tiro marĩrõ cũ añurõ pajaña'se me'rã ucũrõnojõta musãrẽ ojasĩ'rĩsa'a. Æpẽrã yu'ure a'tiro nisama: “Cũ marĩ tiropu tutu-atigu, pajasecʉogu weronojõ ucũme'rĩcã'mi”, nisama. “Yoaropu papera o'ógu pe'e, tutuaro me'rã ojao'omi”, nisama. ² Yu'ure musã tiropu wa'agu, tutuaro me'rã ucũcã weeticã'ña. Æpẽrã “Cũ a'ti turicjũ weronojõ Æpẽrã yu'rũoro nisĩ'rĩmi. Õ'acũ dutiro me'rã mejeta ucũmi”, nisama. Yu'u tojo wãcũrãnojõrẽ tutuaro me'rã ucũpõtẽomasĩ'i. ³ Ũsã a'ti turipu ni'i, nĩrã pe'e. Tojo nimirã, ũsã a'ti turicjãrã weronojõ weewe'e. ⁴ Surara a'mewẽjẽrã, narẽ ï'atu'tirãrẽ docaque'acã weesama. Na

weronojõ ùsã quẽ'rã ña'asere docaque'acã weesĩ'rĩ'i. Tojo weesĩ'rĩrã, a'ti turicjãrã wã-motiro weronojõ weewe'e. Ûsã basu ùsã tutuaro ucũse me'rã, ùsã me'rĩse me'rã ña'asere cõ'awe'e. Tojo weronojõ o'orã, ùsã Õ'acũ tutuase me'rã pe'e cũrẽ ãjõpeotirã na wãcũsere cõ'a'a. Na ãpẽrã ãjõpeobo'cãrãrẽ cã'mota'asere cõ'a'a. Cũ tutuase me'rã masã na masiyu'rua'a ni tu'oña'sere wapamarĩse do-jocã wee'e. ⁵ Cũ tutuase me'rã ùsã na "Niwe'e" nisere cõ'a'a. Nipe'tise Õ'acũrẽ ãjõpeoticã weesere cõ'a'a. Nipe'tirã Cristo ãaronojõ wãcũ, cũrẽ queoro ãjõpeocã wee'e. Narẽ cũ dutiro weeato nĩrã tojo wee'e. ⁶ Musã Jesucristo ãaro añurõ weeyu'rutẽrica be'ro ùsã a'tiro weemasĩ'i. Musã queoro weeticã, yu'rũnu'cãrãrẽ bu'iri da'remasĩ'i.

⁷ Musã bu'icjase dia'cũrẽ ï'a'a. No'o "Jesucristo yagu ni'i" nigũnojõ a'tiro masĩrõua'a. Cũ ucũrõnojõta ùsã quẽ'rãrẽ "Cristo yarã nima", nirõua'a. ⁸ Marĩ wiogu ùsãrẽ a'tiro weedutiwĩ. Musãrẽ "Añurõ ãjõpeocã weeya", niwĩ. Musã ãjõpeosere dojorẽdutiwĩ. Tere ãpũtu ucũnu'cũsĩ'rĩmigũ, yu'u ucũsere bopoyawe'e. ⁹ Yu'u ojawũase pũrĩ me'rã musãrẽ tu'oucuadutigu mejẽta oja'a. ¹⁰ ãpẽrã yu'ure a'tiro nisama: "Cũ ojase tutuabutia'a. Cũ bajuyoropũma tutuatũ'satigu bajumimi. Cũ ucũse quẽ'rãrẽ sõ'owaro tu'saya marĩ'i", nisama. ¹¹ Yu'ure tojo nirãnojõ a'tiro masĩrõua'a: "Cũ yoaropũ nígũ oja'caronojõta marĩ tiropũ nígũ quẽ'rã, mejãrõta tutuaro

ucũgũsami", nirõua'a.

12 Yũ'u ãpẽrã na basu añurõ ucũrã me'rã ni'cãrõwijiisĩ'rĩtisa'a. A'tere ne cã'rõ ucũma'asĩ'rĩtisa'a. Na tũ'omasĩtima. Na ɯaro a'tiro nisama: "Marĩ weronojõ weerã añurã nima", nisama. Nipe'tirãrẽ ã'abesesama.

13 Yũ'u ãpẽrã ye da'rasere "Weeapũ", niwe'e. Õ'acũ yũ'ure weredutigũ cũu'caro ejatuaro wereme'ricã'a. Cũta yũ'ure musã tiropũ bu'egũ wa'adutiwĩ. 14 Tojo nígũ, nisoogu mejeta wee'e. Musã tiropũ ejagu, Õ'acũ yũ'ure cũu'quere weewũ. Yũ'uta musãrẽ añuse Cristo masãrẽ yũ'ruomi nise quetire weremũ'tãwũ.

Tojo weegu yũ'u wee'quere queoro ucũ'u.

15 Yũ'u Õ'acũ cũu'que nemorõ da'rawe'e. Tojo weegu ãpẽrã na da'rasere "Yũ'u da'rasede ni'i", niwe'e. Tojo níronojõ o'ogu, yũ'u da'ra'quepare da'rasĩ'rigũ, musã tiro pe'e nemorõ da'rasĩ'rĩ'i. Musã ãjõpeocã ã'agũ, musãrẽ nemorõ bu'emasĩ'i.

16 Musã nemorõ ãjõpeoca be'ro musã yũ'rũro nise macãrĩpũ Jesucristo ye quetire werese'saguti. Cũ ye quetire wereya marĩse macãrĩpũ wa'asĩ'rĩsa'a. ãpẽrã na da'ra'quepare "Yũ'u da'rasede ni'i" nisĩ'rĩtigũ, tojo weesĩ'rĩsa'a.

17 Õ'acũ ye queti ojãca pũrĩpũ a'tiro ojano'wũ: "Ni'cũ ãpẽrã yũ'ruoro niyũ'rũnũ'cã'a' nisĩ'rigũ, niticã'to. Tojo wãcũronojõ o'ogu, marĩ wioogu pe'ere 'Tutuayũ'rũgu nimi, marĩrẽ añubutiaro weecu niwĩ', niato." 18 Ni'cũ cũ basu ucũgũ, "Yũ'u añurõ wee'e" nigũnojojõrẽ "Cũ añugũ nimi",

nita basiowe'e. Jesucristo marĩ wiogu "Añugũ nimi" nino'gũ pe'e añugũ nimi.

11

Pablo niṣoori masãrẽ nise ni'i

¹ Ni'cãrõacã yu'u ucũma'agũ weronojõ ojaguti. No'o musã nu'cãta basioro nu'cãña. Musã tojo weecã u'a. ² Õ'acũ cũ yarãrẽ ãpẽrãnojõrẽ ãjõpeocã, doesami. Cũ doero weronojõ yu'u musãrẽ doe'e. Yu'u Cristo yere werecã, musã tu'orã, ãjõpeowu. Musã ni'cõ numio marãputiacjo weronojõ ni'i. Cristo musã marãpu niacju weronojõ nimi. Tojo weegu musã cũ i'orõpũre ña'ase marĩrã nicã u'a. ³ Tojo uamigũ, musãrẽ a'tiro wa'acã uisa'a. Pĩrõ cũ niqesãse me'rã Evare nisoo ãjõpeocã weecu niwĩ. Musã quẽ'rã co weronojõ ãpẽrã nisoosere ãjõpeobosa'a. Musã Cristore queoro ãjõpeomi'quere du'ubosa'a. Tojo weegu uisa'a. ⁴ Musã a'tiro wee'e. ãpẽrã musãrẽ mejẽcã werecã, añurõ tu'otu'sa'a. Ûsã Jesú yere werewu. Na pe'e te mejẽtare werema. Musã ne waropũre Espĩritu Santure ñe'ewũ. Ni'cãrõacãrẽ Espĩritu Santu mejẽtare ñe'erã wee'e. Na Õ'acũ masãrẽ yu'ruose mejẽtare werecã, añurõ tu'o ãjõpeo'o. ⁵ Na musãrẽ bu'erã Jesucristo besecũ'cãrã nemorõ tu'oña'sama. Yu'u pe'e na doca tu'oña'we'e. ⁶ Yu'u ucũse u'suawe'e, u'suaro pe'e. Tojo nimicã, Õ'acũ ye cjasere añurõ mas'i. Yu'u tojo masĩsere nipe'tise yu'u weesetise me'rã i'o'o.

7 Ne waro yu'u Õ'acũ masãrẽ yu'ruose quetire musãrẽ weregu, wapaseetiwu. ¿Musã de'ro wãcũti? Apetero weegu musãrẽ wapaseetigu, ¿ña'arõ weegu weepari? Yu'u da'ra wapata'aba'awu. Musãrẽ añurõ weesĩ'rigũ, tojo weewu. 8 Yu'u musã tiropu nirĩ curare ãpẽrã Jesucristore ejõpeose cururicjãrã yu'ure niyeru o'owã. Yu'u tere ñe'e, musãrẽ weeta-musĩ'rigũ, na ye niyerure a'maduogu weronojõ tu'oña'wũ. 9 Yu'u musã me'rã nígu, apeyenojõ du'sacã ñ'agũ, ne ni'cũrẽ caribotiwu. Marĩ acawererã Macedoniacjãrã yu'ure du'sasenojõrẽ o'owã. Tojo weegu caribotiwu. A'tirota weeyapatiguti. 10 Yu'u diacjũ nise Jesucristo ye quetire masĩ'i. Diacjũta ni'i. Te diacjũ níronojõta yu'u bu'ese wapa ne niyeru sãrisome. Ne ni'cũ Acaya di'tacjũ "Cũ wapaseemi", nímasĩtisami.

11 Yu'u musãrẽ ma'ise ye bu'iri tojo ucũ'u. Yu'u musãrẽ ma'iyu'rũsere Õ'acũ masĩsami.

12 Yu'u weewuaronojõ weenu'cũgũti. ãpẽrã pe'e yu'u weronojõ weerã wee'e, nisama. Na bu'ese wapare wapaseesama. Yu'u pe'e wapaseewe'e. Tojo weerã na "Cũ weronojõ wee'e", nímasĩtisama. 13 A'tiro ni'i. Na "Cristo cũ besecũú'cãrã ni'i" níãrã, tojo nima'acãrã weema. Na weeta'sarã nima. Bu'ia dia'cũ Jesucristo cũ besecũú'cãrã weronojõ bajuma. 14 Tojo weese diasatisa'a. Wãtĩa wiogu quẽ'rã tojota weemasĩsami. Apetero cũ u'musecjũ Õ'acũrẽ wereco'tegu weronojõ bajugu dojosami. 15 Tojo weerã cũrẽ da'ra-

co'terã quẽ'rã cũ weronojõ weesama. Na añurã weronojõ weesoosama. Na pũricã na wee'caronojõta bu'iri da'reno'rã, pecame'epu yapatidijarãsama.

Pablo Jesucristo besecũ'ucũ cũ pi'eti'que ni'i

¹⁶ Yu'u a'te duporo oja'caronojõ musãrẽ ojanemogũti. "Cũ basu añurõ ucũgũ, maatigu weemi", niticã'ña. Musã tojo wãcurã pũricã, "Cũ maatigu weronojõ ucũato", niña. Tojo weegu cã'rõacã yu'u basu añurõ ucũgũsa'a.

¹⁷ Yu'u tojo ucũgũ, marĩ wioogu duti'caro mejẽta ucũgũ wee'e. Yu'u basu añurõ ucũme'rĩgũ, maatiri masũ weronojõ busu'u.

¹⁸ Pãjãrã no'o uaro na basu añurõ ucũma. Na tojo weeyucã, yu'u quẽ'rã yu'u weesere añurõ ucũgũti. ¹⁹ Musã masiyu'ruarã nitjãrã, maatiri masã na weesere añurõ nu'cã'a.

²⁰ Musã a'tiro wee'e. Æpẽrã musãrẽ dutipecã, nu'cãsa'a. No'o musã yere miiwapacã, nu'cãsa'a. No'o tojo weetirã, musãrẽ mejõ nirã weecã, nu'cãsa'a. Tu'omasitirãrẽ weronojõ ï'acõ'acã, nu'cãsa'a. No'o musãrẽ diapoapu paacã quẽ'rãrẽ, nu'cãcã'sa'a. Tojo weese nipe'tisere nu'cãpe'ocã'sa'a. ²¹ Na musãrẽ tojo wéerã, ña'abutiario weerã weeama. Æsã pũricã musãrẽ tenojõrẽ ne weemasitibosa'a.

Æpẽrã na weesere añurõ ucũcã, yu'u quẽ'rã na weronojõ ucũma'asirutuguti. Maatigu weronojõ weema'a'a. ²² Na "Hebreo masã ni'i", nisama. Yu'u quẽ'rã cũta ni'i. Na Israe curuacjãrã nima. Yu'u quẽ'rã cũta ni'i.

Na Abrahã pãrãmerã nituriarã nima. Yu'u quẽ'rã cûta ni'i. ²³ Na "Cristore da'raco'terã ni'i", nima. Yu'u pûrĩcã na nemorõ cãrẽ da'raco'tegu ni'i. Yu'u tojo nígũ, ucũma'agũ weronojõ busu'u, busugu pe'e. A'tiro ni'i. Yu'u na nemorõ da'rayu'runu'cãwũ. Yu'ure na nemorõ tãrãwã. Na nemorõ bu'iri da'leri wi'ipu pejetiri sõrõno'wũ. Pejetiri Jesucristore ãjõpeotirã yu'ure wẽjẽsĩ'ricã, wiose pu'to niwũ. ²⁴ Ni'cãmocusetiri judío masã yu'ure wecu dari me'rã tãrãwã. Tetirinucũ treinta y nuevetiri tãrãwã. ²⁵ I'tiati yucupagu me'rã yu'ure paawã. Ni'cãti ãtãperi me'rã yu'ure doquewã. I'tiati ãsã sijari cura yucusujo mirĩdijawũ. Ni'cãti mirĩdijacaterore ni'cã ñami, ni'cã numu ti maajopure pa'sabo'reawũ. ²⁶ Yu'u pejetiri sijawũ. Mirĩtawioro sijawũ. Wioro, yajari masã tiropu sijawũ. Yu'u acawererã judío masã tiropu, judío masã nitirã tiropu wiose wa'tero sijawũ. Tojo nicã macãpüre, masã marĩrõpüre, dia pajiri maajopure wiose wa'tero sijawũ. "Jesucristore ãjõpeorã ni'i" nisoori masã wa'teropu quẽ'rãrẽ wiose wa'tero sijawũ. ²⁷ Yu'u da'ragu, pi'etiawũ. Pejetiri cãrĩtimujãwũ. Ujaboawũ. Acowuowũ. Apeterore ba'atiyu'ruomujãwũ. Yusuabuawũ. Apeterore su'ti moowũ.

²⁸ Apeyema, a'tiro tu'oña'a. Umucorinucũ yu'u Jesucristore ãjõpeose cururicjãrã nipe'tiropu nirãrẽ wãcũque'ti'i. ²⁹ No'o tutuatigunojõ nicã, yu'u quẽ'rã cã tutuatisere tu'oña'tamu'u. Ni'cã Jesucristore ãjõpeogure ãpẽrã ña'arõ weeduticã, cã ña'arõ weecã,

yu'u bopoyasã'a. Cũrẽ ña'arõ weecã weerã me'rã ua'a. ³⁰ Yu'u pe'e "Ãpẽrã yu'ruoro ni'i" nirõnojõ o'ogu, yu'ure wa'a'que me'rã tutuatigu ni'i nisere ñ'ogũti. ³¹ Õ'acũ, marĩ wioгу Jesucristo pacu yu'u ucũsere "Diacjũta ni'i", nĩmasĩsami. Cũrẽta "Añugũ nimi", ninu'cũrõua'a. ³² Yu'u Damascopu nicã, a'tiro wa'awu. Ti di'ta wioгу waro Aretas wãmetigu cũ docacjũ a'tiro weecu niwĩ. Yu'ure ñe'esĩ'rigũ, ti macã sumuto na yéeca sã'rĩrõ wi-jaase soperipure surarare cũucu niwĩ. ³³ Yu'u me'rãcjãrã pe'e yu'ure a'tiro weewã. Pi'i me'rã ti sã'rĩrõ u'muarõ nirĩ sopeacãpu o'oyu'ruodijowã. Tojo weegu yu'u narẽ ñe'eotiwu.

12

Pablo quẽ'ese weronojõ ñ'a'que ni'i

¹ Marĩ basu añurõ ucũcã, wapamarĩ'i. Tojo nimigũ, ucũgũti. Marĩ wioгу quẽ'ese weronojõ yu'ure ñ'o'quere wereguti. ² Jesucristore ãjõpeoca be'ro a'tiro wa'awu. Quẽ'ese weronojõ Õ'acũ yu'ure cũ tiropu miimujãwĩ. Tere yu'u ñ'aca be'ro catorce cũ'marĩ yu'ru'u. Yu'u upu me'rã o yu'u ejeripõ'rã dia'cũ wa'agu, wa'apã. Masĩtisa'a. Õ'acũ dia'cũ masĩsami. ³⁻⁴ A'tere masĩ'i. Õ'acũ u'muse Paraíso wãmetiropu yu'ure miiejawĩ. Upu me'rã o ejeripõ'rã dia'cũ miagũ, miapĩ. Masĩtisa'a. Õ'acũ ni'cũta tere masĩsami. Yu'u topu nĩgũ, masã masĩtisere tu'owu. Cũ were'que masãrẽ weredutise mejẽta niwũ. ⁵ A'tiro wa'aganojõ pũrĩcãrẽ "Ãpẽrã

yu'ruoro nimi", nirõua'a. Yu'u basu "A'tiro nigũnojõ ni'i", nímasĩtisa'a. Yu'u tutuatise dia'cũrẽ añurõ ucũgũti. ⁶ Tojo nimigũ, yu'u basu añurõ ucũgũ, ucũma'agũ mejeta weebosa'a. Diacjũta ucũbosa'a. A'tiro ni'i. Musã yu'ure ãjõpeobosa'a. Tojo weeri nígũ, "Yu'u ãpẽrã yu'ruoro ni'i" nisere nisome. Yu'u weetisepureta, yu'u weretisepureta yu'ruoquejobosa'a.

⁷ Õ'acũ yu'ure ã'o'que añubutiase niwũ. Yu'u tere wãcũgũ, yu'u basu "Añuyu'ruagu ni'i", nitawio ni'i. Tojo weegu Õ'acũ yu'ure tojo wãcũrĩ nígũ, a'tiro weewĩ. Wãtĩ yu'u upure dutida'recã, tojo ã'acã'cu niwĩ. Te duti yu'ure pota bu'bero weronjõ pũrĩ'i. ⁸ I'tiati yu'u marĩ wiogure "Te pũrise pe'tiato", sãrĩmiwũ. ⁹ Cũ pe'e yu'ure a'tiro niwĩ: "Yu'u mu'urẽ ma'i'i. Tojo weero mu'urẽ apeyenojõ du'sawe'e. Masã tutuatirã nicã, yu'u tutuasere nemorõ ã'ota basio'o", niwĩ marĩ wiogu. Tojo weegu yu'u tutuatigu, e'cati'i. Tojo tutuatigu, Cristo tutuase yu'upure niato nígũ tojo wee'e. ¹⁰ Yu'ure ña'arõ ucũsere, yu'ure apeyenojõ du'sasere e'cati'i. Tojo nicã ãjõpeose bu'iri ña'arõ weesere, mejẽcã wa'asere e'cati'i. A'tiro ni'i. Tutuatironjõ o'ogu, nemorõ tutuagu wa'a'a.

Corintocjãrã ãjõpeori curuacjãrãrẽ Pablo wãcũnrũ'que ni'i

¹¹ Yu'u, yu'u basu añurõ ucũgũ, maatigu weronjõ wee'e. Musã pe'eta yu'ure tojo ucũdutarã weronjõ wee'e. Musã yu'ure añurõ ucũcã, añu nibopã. ãpẽrã musãrẽ nisoose

me'rã ějõpeocã weerã doca niwe'e. Na a'tiro nisama: "Ûsã Jesucristo besecũ'cãrã nemorõ ni'i", nisama. Yu'u mejõ nigũ nimigũ, tojo bususijãrã dijaro niwe'e. ¹² Yu'u musã tiropu pi'etimigũ, wãcũtutuatiãgũ, peje Õ'acũ tutuaro me'rã weẽ'owũ. Te me'rã diacjũta yu'ure Jesucristo besecũ'quere i'owũ. ¹³ Musã Corintocjãrãrẽ apẽrã Jesucristore ějõpeose cururicjãrã doca ějõnu'cõtiwu. A'te dia'cũrẽ weeticãti. Musãrẽ wapasetiwu. Musã tu'oña'cã, ¿yu'u tojo weese ña'a niti? Ña'acãma, acobojoya.

¹⁴ Yu'u musã tiropu wa'atjere apoyugu wee'e. Ni'cãrõacã yu'u wa'ase me'rã i'tiati wa'arosa'a. Musãrẽ "Weetamuña", ni caribosome. Musã cuosere e'masome. A'te dia'cũrẽ u'a'a. Musã Cristo duti'quere añurõ weecã u'a'a. A'tiro ni'i. Pacusumua na põ'rãrẽ na uasere o'osama. Na põ'rã mejeta na pacusumarẽ na uasere o'osama. A'tiro wéerã, musã yu'u põ'rã weronojõ ni'i. Tojo weerã yu'ure yu'u uasere o'owe'e.

¹⁵ Yu'u cuose ejatuaro musãrẽ weetamugũti. Nipe'tiro yu'u weepõtẽota basioro musãrẽ añurõ wa'ato nígũ tojo weetamugũti. A'tiro tu'oña'a. Yu'u musãrẽ nemorõ ma'icã, musã pe'e yu'ure ñajaro ma'ibosa'a.

¹⁶ Apẽrã yu'u caribotisere masĩmirã, a'tiro nisama: "Cũ me'rĩse me'rã musãrẽ ějõpeocã weecu niwĩ", nisama. ¹⁷ ¿Yu'u o'ó'cãrã musãrẽ nisoo, musã yere e'marĩ? Ne apeyenojõ e'maticãrã niwã. ¹⁸ Yu'u Titore musã tiropu wa'adutiwu. Tojo nicã apĩ Jesucristore ějõpeogu

marĩ acaweregure cũ me'rã o'ówu. ¿Topure Tito nisoose me'rã musã yere ã'marĩ? Musã masĩsa'a. Tito yu'u weronojõ weemi. Musãrẽ bu'égũ, añuse dia'cũrẽ weesĩ'ricũ niwĩ. Ne wapaseeticũ niwĩ.

¹⁹ Apetero weerã musã ãsãrẽ “Añurõ wãcũ-dutirã weema”, nisa'a. Tojo niwe'e. A'tiro pe'e ni'i. ãsã Õ'acũ ĩ'orõpure Cristo dutiro me'rã ucũ'u. Yu'u mairã yu'u acawererã, musãrẽ Õ'acũrẽ nemorõ ãjõpeonemodutigũ tojo wee'e.

²⁰ Yu'u uisa'a. Apetero weerã yu'u musã tiropũ wa'acã, “Yu'u ãronojõ mejẽta weerã weebosama”, nisa'a. Musã quẽ'rã yu'ure mejãrõta nibosa'a. Apeye quẽ'rãrẽ yu'u musãrẽ “A'tiro weerã weebosama”, nisa'a. “A'metu'tirã weebosama. Õorã weebosama. Uarã weebosama. Na ye dia'cũrẽ wãcũrã weebosama. ãpẽrãrẽ ucja, ña'arõ ucũrã weebosama. Tojo nicã ‘ãsã ãpẽrã yu'ruoro añuyurũnũ'cã'a’, nirã weebosama. No'o ãaro weema'acãrã weebosama”, nisa'a. ²¹ Yu'u uisa'a. Musã tiropũ apaturi wa'acã, Õ'acũ yu'u wiogũ musã ña'arõ wee'que bu'iri yu'ure bopoyoro yu'rucã weebosami. Tojo nicã ña'arõ wee'cãrã acobojose sãriticã, pũrõ utibosa'a. Musã ña'arõ weesere, ña'arõ wãcũsere, no'o musã a'metãrãbajaque'atisere pũrõ bujawetibosa'a. Nipe'tise ña'ase ãaripejase, musã weewuasenojõrẽ du'uticã, mejãrõta bujawetibosa'a.

13

Pablo weretuose, cũ we'eritituose ni'i

1 Ni'cārōacã yu'u musã tiropu wa'ase me'rã i'tiati wa'arosa'a. Õ'acũ ye queti ojãca pũrĩpũre a'tiro ojano'wũ: "Puarã o i'tiarã ã'ãca be'ro marĩ ãpẽrã wee'quere ã'a'cãrã weresãmasĩno'o." 2 Toduporopu musã tiro nĩgũ, ña'arõ weerãrẽ "Bu'iri da'regũti", ni weretojawu. Tojo nicã nipe'tirãrẽ werewu. Ni'cārōacã yoropu nimigũ, wenenemogũti tja. Yu'u apaturi musã tiropu wa'agu, ña'arõ weerãrẽ pajaña'some majã. 3 Tojo weecã musã masĩrãsa'a, Cristo yu'ure wãcũse o'ose me'rã ucũ'u. Cristo musãrẽ dutigu tutuaticã weetimi. Musãrẽ cã tutuayurũsere ã'omi. 4 Diacjũta ni'i. Cã curusapu tutuatigu weronojõ paabi'peno'cu niwĩ. Tojo nimigũ, ni'cārōacãrẽ cã pacu tutuaro me'rã catimi. Ũsã quẽ'rã cã ní'caronojõta tutuatirã ni'i, nĩrã pe'e. Tojo nimirã, cã yarã niyurã, Õ'acũ tutuaro me'rã ninu'cũ'u. Tojo weerã musãrẽ weetamumasĩ'i.

5 Musã "¿Jesucristore ãjõpeorãta nimiti ũsã?" ni, musã basu beseya. ¿Ũsã ãjõpeose diacjũta nimitito? nĩrã, tojo wãcũña. ¿Ũsãpũre Jesucristo diacjũta nimiti? nĩrã, tu'oña'rẽ musã. Apetero weerã cãrẽ ãjõpeotirã, ãjõpeotisa'a musã. 6 Ũsã Jesucristore diacjũta ãjõpeo'o. Cã yarã ni'i. Musãrẽ tere masĩcã u'a'a. 7 Ũsã musãrẽ ña'arõ weeticã'to nĩrã Õ'acũrẽ sãrĩbosa'a. Cãrẽ sãrĩrã, ũsãrẽ ãjõpeodutirã mejẽta sãrĩbosa'a. Musã pe'ere queoro weedutirã sãrĩbosa'a. No'o ũsã queoro weemicãta, "Na queoro weetima" ũsãrẽ nicã,

añucã'rõsa'a. ⁸ A'tiro ni'i. Õ'acũ ye diacjũ cjaseta ni'i. Musã tere queoro weecã ï'arã, "A'tiro pe'e weeya", nisome. Ûsã tereta uasã'a. ⁹ Musã ùsãrẽ ï'arã, "Na tutuatirã, dutimasitirã nima", ni'i. Musã pe'e tutuarã nicã, añu ni'i. Tere ï'arã, ùsã e'catirãsa'a. Musãrẽ Õ'acũ nipe'tisere cũ uaronojõ weecã uarã, sãrĩbosa'a. ¹⁰ Yu'u musã tiropu wa'ase duporo a'ti pũrĩrẽ oja'a. Topu wa'agu, tutuaro me'rã musãrẽ tu'tisi'rĩtisa'a. Marĩ wioqu yu'u musãrẽ dutimasĩsere o'ocu niwĩ. Tojo weegu yu'u musãrẽ tu'timasĩ'i. Tojo weesĩ'rĩtisa'a. Jesucristo musã ãjõpeosere dojorẽdutigũ mejẽta dutisere yu'ure o'owĩ. Musãrẽ nemorõ ãjõpeocã uagu, tojo weewĩ.

¹¹ Acawererã, tocã'rõta ojaguti. Añurõ niña. Yu'u musãrẽ duti'quere queoro weeme'rĩcã'ña. A'merĩ wãcũtutuacã weeya. Ni'cãrõnojõ niseti, a'mequẽrõ marĩrõ niña. Õ'acũ ejerisãjãcã weegũ, musãrẽ ma'igũ musã me'rã nigũsami. ¹² E'catise me'rã a'merĩ añudutiya. ¹³ Nipe'tirã Jesucristore ãjõpeorã marĩ acawererã musãrẽ añudutima.

¹⁴ Jesucristo marĩ wioqu musã nipe'tirãrẽ añurõ weeato. Õ'acũ musãrẽ ma'igũ musã me'rã niato. Tojo nicã Espĩritu Santu musã me'rã niato.

Tocã'rõta oja'a.

Pablo

Õ'âkĩ hi yeere uúkũri turi Tukano
New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 22 Sep 2022 from source files dated 9 Oct 2020

00ebd04f-7b0d-5a72-9407-eb53ae2bd086